

di Maria Sale

III. Sa sabientzia obero in s'istoria dae Adamo a Mosè

1) Issa at bardadu su babbu de su mundu, prima criatura de Deus, cand'est istadu criadu a su solu, poi l'at liberadu de sa rutta sua,

2) e l'at dadu sa fortza pro dominare totu sas cosas.

3) Ma unu ingiustu, istrejendesiche dae issa, in s'arribiu sou morit pro s'arrennegu sou bocchidore de frades.

4) Pro causa sua sa terra est istada coberta de abba, ma sa sabientzia l'hat salvada de nou, ghiende su giustu e pro mesu de unu miseru bicculu 'e linna.

5) Issa cando sas zentes fin cunfusas, cuncordas solu in su faghene male, at connotu su giustu e l'at tentu chena mancia peruna addainanti a Deus, e l'at mantesu forte cun sa teneresa chi s'at pro unu fizu.

6) E mentres chi sos malos morian, at salvadu su giustu, chi fuiat dae su fogu rutu subra sas chimbe tzitades.

7) Cale testimonìa de cussa zente mala isistit ancora una terra desolada, arrida, cun sas arvures chi produin frutures chi restan cruas e pro ammentu de un'anima incredula, si pesat

una columna de sale.

8) Istrejendesi dae sa sabientzia, no solu an appidu su dannu de no conoschere su bene, ma an lassadu a sos bios un'ammentu disattinadu, ca sas gulpas insoro non sun restadas cuadas.

9) Ma sa sabientzia at liberadu sos devotos suos dae sas suferentzias,

10) issa at gitu in sos caminos deretos su giustu chi fuiat a s'ira de su frade, l'at mustradu su regnu de Deus e l'at dadu sa conoschentzia de sas cosas santas, l'at dadu fortuna in sas fadigas suas e abbondantzia de fruttos in su tribagliu sou.

11) L'at assistidu contr'a s'avaritzia de sos inimigos e l'at fatu riccu,

12) l'at bardadu dae sos inimigos, l'at costoìdu contr'a chie l'infadaiat, l'at fatu 'inchere in-d'una lotta dura, pro chi ischerat chi sa piedade est pius potente de totu.

13) Issa no at abandonadu su giustu 'endidu, ma l'at bardadu dae su peccadu.

14) Est falada cun issu in sa prejone, no l'at abandonadu cando gighiat sas cadenas, fintzas chi no l'at procuradu un'iscettru de re e l'at dadu podere contras de sos inimigos, at iscaratzadu comente faularzos sos chi l'an accusadu e l'at dadu una gloria eterna. S'esodo - Sa 'essida

15) Issa at liberadu unu populu santu e una zenia chena mancia da una nazione de oppressores.

16) Est intrada in s'anima de unu teraccu de su Signore e s'est contrammissa cun ispantos e signales a sos res ispramosos.

17) At dadu a sos santos sa ricumpensa de sas penas inoro, los at ghiàdos in-d'un'istrada meravizosa, est diventadu ampàru inoro a de die e lughe de istellas in sa notte.

18) Lis at fatu attraessare su Mar Rosso, gitendechelos pro atraessare abbas meda,

19) At cobertu, invece, sos inimigos inoro e che los at bettados in s'ispregradu.

20) Pro custu sos giustos an ispozadu sos malos e an fatu famàdu, Signore, su nomene tou santu e an lodadu cuncordos sa manu tua àmparadora,

21) Pruite sa sabientzia aiat abertu sa 'ucca de sos mudos e aiat isgioltu sa limba de sos minores.

